



**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ**  
**ՏՆՏԵՍԱԿԱՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՊԵՏԱԿԱՆ**  
**ՀԱՆՁՆԱԺՈՂՈՎԻ ՆԱԽԱԳԱՀ**

---

---

**Հ Ր Ա Մ Ա Ն**

18 հունիսի 2008 թվականի N° 33-Ա

ք. Երևան

**ՔԱՂԱՔԱՑԻՆԵՐԻ ԸՆԴՈՒՆԵԼՈՒԹՅԱՆ ԿԱԶՄԱԿԵՐՊՄԱՆ ԿԱՐԳԻ ՄԱՍԻՆ**

Հայաստանի Հանրապետության տնտեսական մրցակցության պաշտպանության պետական հանձնաժողովի (այսուհետ՝ Հանձնաժողով) նախագահի, տեղակալի, անդամների, Հանձնաժողովի աշխատակազմի ղեկավարի, նրա տեղակալի և կառուցվածքային ստորաբաժանումների ղեկավարների (այսուհետ՝ Հանձնաժողովի պաշտոնատար անձինք) մոտ քաղաքացիների ընդունելության կազմակերպման գործընթացը կանոնակարգելու նպատակով,

հիմք ընդունելով «Տնտեսական մրցակցության պաշտպանության մասին» Հայաստանի Հանրապետության օրենքի 23-րդ հոդվածի առաջին մասի «բ» և «է» կետերը՝

հրամայում եմ

1. Հաստատել Հանձնաժողովի պաշտոնատար անձանց մոտ քաղաքացիների ընդունելության կազմակերպման կարգը (այսուհետ՝ ընդունելության կարգ)՝ համաձայն հավելվածի:

2. Հանձնաժողովի աշխատակազմի ղեկավարին և մամուլի քարտուղարին՝

5-օրյա ժամկետում ապահովել ընդունելության կարգի մասին հանրության իրազեկումը, այդ թվում՝ Հանձնաժողովի ինտերնետային կայքի միջոցով, ինչպես նաև ընդունելության կարգի պատճենի և ընդունելության օրերի և ժամերի մասին տեղեկատվության տեղադրումը քաղաքացիների համար մատչելի տեղում:

3. Սույն հրամանն ուժի մեջ է մտնում ստորագրման պահից:

Ա. Շահնագարյան

## ԿԱՐԳ

### **ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՏՆՏԵՍԱԿԱՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՊԵՏԱԿԱՆ ՀԱՆՁՆԱԺՈՂՈՎԻ ՊԱՇՏՈՆԱՏԱՐ ԱՆՁԱՆՑ ՄՈՏ ՔԱՂԱՔԱԳԻՆԵՐԻ ԸՆԴՈՒՆԵԼՈՒԹՅԱՆ ԿԱԶՄԱԿԵՐՊՄԱՆ**

1. Սույն կարգով կարգավորվում են Հայաստանի Հանրապետության տնտեսական մրցակցության պաշտպանության պետական հանձնաժողովի (այսուհետ՝ Հանձնաժողով) նախագահի, տեղակալի, անդամների, Հանձնաժողովի աշխատակազմի ղեկավարի, նրա տեղակալի և կառուցվածքային ստորաբաժանումների ղեկավարների (այսուհետ՝ Հանձնաժողովի պաշտոնատար անձինք) մոտ քաղաքացիների ընդունելության կազմակերպման հետ կապված հարաբերությունները:

2. Սույն կարգի նպատակն է ապահովել Հանձնաժողովի պաշտոնատար անձանց մոտ քաղաքացիների ընդունելության կազմակերպման ընթացակարգի մատչելիությունը:

3. Քաղաքացիների մուտքը Հանձնաժողովի շենք իրականացվում է անցագրային ռեժիմին համապատասխան:

4. Հանձնաժողովի պաշտոնատար անձանց մոտ ընդունելությունը, որպես կանոն, իրականացվում է քաղաքացու բանավոր դիմումի հիման վրա:

5. Քաղաքացու գրավոր դիմումի հիման վրա ընդունելությունը կազմակերպվում է սույն կարգին համապատասխան՝ քաղաքացու կողմից դիմումում նշված ժամկետում, իսկ ժամկետ նշված չլինելու դեպքում՝ ողջամիտ ժամկետում:

6. Հանձնաժողովի անդամների և աշխատակազմի ղեկավարի մոտ քաղաքացիների ընդունելությունը կազմակերպվում է նշված պաշտոնատար անձանց օգնականների միջոցով: Հանձնաժողովի նախագահի մոտ ընդունելություն կարող է կազմակերպվել նաև վերջինիս խորհրդականի միջոցով՝ Հանձնաժողովի նախագահի հանձնարարությամբ:

7. Հանձնաժողովի պաշտոնատար անձանց մոտ ընդունելությունն իրականացվում է հետևյալ ժամանակացույցով.

1) Հանձնաժողովի նախագահի մոտ՝ յուրաքանչյուր երկուշաբթի, ժամը 11:00-ից մինչև 13:00-ն.

2) Հանձնաժողովի նախագահի տեղակալի մոտ՝ յուրաքանչյուր ուրբաթ, ժամը 15:00-ից մինչև 18:00-ն.

3) Հանձնաժողովի անդամների մոտ՝ յուրաքանչյուր հինգշաբթի, ժամը 15:00-ից մինչև 18:00-ն.

4) Հանձնաժողովի աշխատակազմի ղեկավարի, նրա տեղակալի, վարչությունների և առանձնացված բաժների պետերի մոտ՝ յուրաքանչյուր հինգշաբթի, ժամը 11:00-ից մինչև 13:00-ն:

8. Առանձին դեպքերում, Հանձնաժողովի նախագահի կամ Հանձնաժողովի աշխատակազմի ղեկավարի հանձնարարությամբ կամ համաձայնությամբ, Հանձնաժողովի համապատասխան պաշտոնատար անձանց մոտ քաղաքացիների ընդունելություն կարող է իրականացվել նաև սույն կարգի 7-րդ կետում չնշված ժամկետներում, բացառությամբ ոչ աշխատանքային օրերի և ժամերի: